
प्रमुख समाचार –

- प्रदेश के नगरीय निकाय म अब स्ट्रीट लाइटिंग के काम पार्षद, अध्यक्ष अउ महापौर निधि ले घलो कराय जा सकही।
- मुख्यमंत्री विष्णुदेव साय ह आज रायपुर के आकाशवाणी चौक स्थित मां काली मंदिर ले डोंगरगढ़ तक मां बम्लेश्वरी के दर्शन बर जवइया बस ल हरा झंडी दिखाके रवाना करीन।
- स्कूल शिक्षा विभाग ह “विद्या समीक्षा केन्द्र” म अवइया शिक्षक अउ विद्यार्थी मनके उपस्थिति दर्ज कराय बर एक मोबाइल ऐप विकसित करे हे।

स्ट्रीट लाइट

प्रदेश के नगरीय निकाय म अब स्ट्रीट लाइटिंग के काम पार्षद, अध्यक्ष अउ महापौर निधि ले घलो कराय जा सकही। नगरीय प्रशासन विभाग ह ए निधि ले करइया काम के सूची म नवा कंडिका जोड़त हुए अब वार्षिक पात्रता राशि के पच्चीस प्रतिशत पइसा प्रकाश व्यवस्था बर खर्च करे अनुमति दे देहे। ए संबंध म सबो नगर निगम के आयुक्त, नगर पालिका अउ नगर पंचायत के मुख्य नगर पालिका अधिकारी मन ल परिपत्र जारी करे हे।

जानबा के मुताबिक उपमुख्यमंत्री अउ नगरीय प्रशासन मंत्री अरुण साव ह हाल ही म विभागीय समीक्षा बइटका म पार्षद, अध्यक्ष अउ महापौर निधि ले करे जाने वाला काम म प्रकाश व्यवस्था ल घलो सामिल करे के निरदेस दे रिहीन।

मुख्यमंत्री-निःशुल्क बस सेवा

मुख्यमंत्री विष्णुदेव साय ह आज रायपुर के आकाशवाणी चौक स्थित मां काली मंदिर ले डोंगरगढ़ तक मां बम्लेश्वरी के दर्शन बर जवइया बस ल हरा झंडी दिखाके रवाना करीन। ए निःशुल्क बस सेवा के लाभ रायपुर ले डोंगरगढ़ जवइया श्रद्धालु मन ल मिलही। मां काली सेवा समिति डहार ले संचालित ए बस सेवा नवरात्र परब के दउरान नौ दिन तक सरलग चलही। ए सेवा के तहत हर दिन चार बस रायपुर ले श्रद्धालु मन ल डोंगरगढ़ तक ले जाही अउ ओमन ल दर्शन के बाद रायपुर लाही। ए बेरा म मुख्यमंत्री ह मां काली के दर्शन करके प्रदेशवासी मन ल शारदेय नवरात्र के बधाई अउ सुभकामना दीन।

उज्ज्वला योजना-एलपीजी कनेक्शन

केन्द्र सरकार ह चालू वित्त बछर के दउरान प्रधानमंत्री उज्ज्वला योजना म अवइया पच्चीस लाख जादा एलपीजी कनेक्शन देके फइसला करे हे। माईलोगिन लाभ पवइया के स्वागत करत प्रधानमंत्री नरेन्द्र मोदी ह कहिन कि सरकार के ए कदम नवरात्र के बेरा म माईलोगिन मन ल नवा खुसी दीहीं। ओमन ह कहिन कि ए पहल ससक्तीकरण के संकल्प ल अउ ससक्त करही। उहें, केन्द्रीय पेट्रोलियम अउ प्राकृतिक गैस मंत्री हरदीप सिंह पुरी ह बतईन कि सरकार हर नवा कनेक्शन म दू हजार रुपिया ले जादा खरच करही। ओमन ह कहिन कि प्रधानमंत्री नरेन्द्र मोदी ह सबो माईलोगिन मन ल खाना बनाय बर ईंधन आसानी ले उपलब्ध करना सुनिश्चित करे रिहीस।

स्वस्थ नारी सशक्त परिवार अभियान

केन्द्रीय स्वास्थ्य अउ परिवार कल्याण मंत्रालय डहार ले चलाय जात “स्वस्थ नारी सशक्त परिवार अभियान” म अवइया आज प्रदेश के प्रधानमंत्री जनजातीय न्याय मिशन—पीएम जनमन क्षेत्र म विशेष जनजातीय स्वास्थ्य सिविर के आयोजन करे गीस। ए सिविर के माध्यम ले पिछड़ा जनजातीय समूह मनके संग हजारों लोगन मन ल स्वास्थ्य सेवा मोबाइल मेडिकल यूनिट्स डहार ले दे गीस। ए अभियान के तहत चौबीस जिला म लगभग पच्चासी स्वास्थ्य सिविर के संचालन करे गीस। सिविर म डॉक्टर अउ प्रसिद्धि स्वास्थ्य कर्मी मन डहार ले सात हजार आठ सौ ले जादा लोगन मनके स्वास्थ्य के जांच करे गीस।

उहें, रायपुर स्थित अखिल भारतीय आयुर्विज्ञान संस्थान—एम्स म घलो “स्वस्थ नारी सशक्त परिवार अभियान” के तहत स्वास्थ्य सिविर अउ जागरूकता कार्यक्रम आयोजित करे गीस। बायोकेमिस्ट्री विभाग ह एसोसिएशन ऑफ बायोकेमिस्ट्री क्लिनिकल वेलफेयर सोसायटी के सहयोग ले धरसीवां के सामुदायिक स्वास्थ्य केन्द्र म गर्भावस्था अउ नवजात शिशु जांच बर विशेष सिविर आयोजित करीस।

अइसने, छत्तीसगढ़ आयुर्विज्ञान संस्थान के स्त्री अउ प्रसूति रोग विभाग डहार ले आयोजित एनीमिया स्क्रीनिंग अउ काउंसलिंग सिविर के काली समापन होइस।

राष्ट्रीय आयुर्वेद दिवस

आज राष्ट्रीय आयुर्वेद दिवस हे। ए बेरा म छत्तीसगढ़ म आने-आने कार्यक्रम आयोजित करे जात हे। बलौदाबाजार म आयुष विभाग डहार ले राष्ट्रीय आयुर्वेद दिवस म रन फॉर आयुर्वेद के आयोजन करे गीस। नगर पालिका अध्यक्ष अशोक जैन ह ए दौड़ ल हरा झंडी दिखाके रवाना करीन।

शिक्षा विभाग—मोबाइल ऐप

स्कूल शिक्षा विभाग ह “विद्या समीक्षा केन्द्र” म अवइया शिक्षक अउ विद्यार्थी मनके उपस्थिति दर्ज कराय बर एक मोबाइल ऐप विकसित करे हे। ए ऐप अब गूगल प्ले स्टोर म उपलब्ध हे अउ एला हरेक शिक्षक डहार ले डाउनलोड करके पंजीयन करना अउ रोज अपन उपस्थिति दर्ज करना अनिवार्य करे गेहे। ए बेवस्था ले शिक्षक अउ विद्यार्थी मनके उपस्थिति के रिकॉर्ड वास्तविक समय म उपलब्ध रहि, जेखर ले विद्यालय के अनुशासन अउ शिक्षा के गुणवत्ता दूनो म सुधार होही। शिक्षा विभाग ह ए संबंध म महासमुंद, बेमेतरा, दंतेवाड़ा, सूरजपुर अउ रायगढ़ के जिला शिक्षा अधिकारी मन ल निरदेस देहे कि ओमन अपन-अपन जिला म ए आदेस के कड़ाई ले पालन सुनिश्चित करय अउ सबो विद्यालय के शिक्षक मन ल ऐप के प्रयोग बर जरूरी मार्गदर्शन दें।

प्रधानमंत्री जन आरोग्य योजना

प्रधानमंत्री जन आरोग्य योजना — आयुष्मान भारत के आज सात बछर पूरा होगे हे। सितंबर दू हजार अट्ठाईस म रांची ले सुरु करे गे ए विश्व के सबले बड़का सरकारी सहायता पाय वाला स्वास्थ्य बीमा योजना हे। ए योजना ले देस के स्वास्थ्य सेवा म क्रांतिकारी बदलाव आय हे। एखर ले पचपन करोड़ ले जादा लोगन मन लाभ पाय हे। प्रधानमंत्री नरेन्द्र मोदी ह कहिन कि आयुष्मान भारत के कारण देस के स्वास्थ्य सेवा म क्रांति आवत हे। सोशल मीडिया पोस्ट म श्री मोदी ह कहिन कि ए योजना ले वित्तीय सुरक्षा अउ सम्मान सुनिश्चित करे गेहे।

मुख्यमंत्री—धमतरी

मुख्यमंत्री विष्णुदेव साय ह आज धमतरी जिला के गांव करेली बड़ी म दू सौ पैंतालीस करोड़ अस्सी लाख रुपिया के लागत के आने-आने विकास काम के लोकार्पण अउ भूमिपूजन करीन। उहें, कुरुद विधानसभा क्षेत्र म होवइया राज्य स्तरीय महतारी सदन के शुभारंभ कार्यक्रम म मुख्यमंत्री ह इंक्यावन महतारी सदन के लोकार्पण करीन। ए बेरा म मुख्यमंत्री ह कहिन कि लगभग दू करोड़ दस लाख रुपिया के लागत ले बने ये भवन माईलोगिन मन बर सम्मान अउ आत्मनिर्भरता के नवा केन्द्र बनही। ए महतारी सदन छत्तीसगढ़ के माता-बहिनी मनके सक्ती अउ क्षमता ल समाज म नवा पहिचान दीहीं।

जीएसटी दर-उपमुख्यमंत्री

वस्तु अउ सेवा कर-जीएसटी के नवा दर काली ले देसभर म लागू होंगे हे। उपमुख्यमंत्री विजय शर्मा ह कहिन कि भारतीय जनता पार्टी छत्तीसगढ़ म जल्दी ही जीएसटी बचत उत्सव चलाही। एमा पार्टी नेता अउ कार्यकर्ता बाजार के दउरा करके दुकानदार अउ ग्राहक मन ले सीधा संवाद करही। “जीएसटी बचत उत्सव” अभियान के उद्देश्य जीएसटी म हाल ही म करे गे दर म कटौती ल लेके जनता ल जागरूक करना हे।

गिफ्ट मिल्क योजना

भिलाई इस्पात संयंत्र-बीएसपी ह तकनीकी कारण ले कुछ समय बर रुके “गिफ्ट मिल्क” योजना ल काली बाईस सितंबर ले फेर सुरू कर देहे। ए योजना के तहत बीएसपी खदान के बफर जोन के साठ गांव के एक सौ चार सासकीय स्कूल म पढईया तीन हजार तीन सौ ले जादा लइका मन ल हर दिन दू सौ मिलीलीटर के फ्लेवर्ड फोर्टिफाइड दूध उपलब्ध कराय जात हे। ए दूध लइका मनके पोषण स्तर म सुधार लाय के उद्देश्य ले मध्यान्ह भोजन के संग अनुपूरक पोषण के रूप म बांटे जात हे।

स्वच्छता ही सेवा

स्वच्छता ही सेवा अभियान के तहत प्रदेशभर म आने-आने कार्यक्रम होवत हे। ए कड़ी म राष्ट्रीय प्रौद्योगिकी संस्थान-एनआईटी रायपुर ह स्वच्छता जागरूकता कार्यक्रम के आयोजन करीन। ए बेरा म संस्थान के लिटरेरी समिति डहार ले “स्वच्छता ही सेवा” विषय म निबंध प्रतियोगिता आयोजित करे गीस। उहें, मनेन्द्रगढ़-चिरमिरी-भरतपुर जिला के पोड़ीडीह के पीएमश्री एकलव्य आदर्श आवासीय विद्यालय म आदि सेवा परब अउ स्वच्छता पखवाड़ा के आयोजन करे गीस। ए कार्यक्रम म स्वास्थ्य मंत्री श्याम बिहारी जायसवाल सामिल होइन।

बस्तर ओलंपिक पंजीयन

बस्तर संभाग म अवइया अक्टूबर-नवंबर महीना म होवइया बस्तर ओलंपिक बर काली ले पंजीयन के प्रक्रिया सुरू होंगे हे। उपमुख्यमंत्री अरुण साव ह दंतेवाड़ा जिला ले एखर सुरूआत करीन। ए ओलंपिक म भाग ले बर खिलाड़ी बीस अक्टूबर तक अपन पंजीयन करा सकत हे।
